

Ndaemnaz

上林县大丰镇皇周小学六(2)班 Lan Danhmeiz/蓝丹梅

“Vaiqguh vaiqguh, rauq naz ndaem haeux.” Dang roegvaiqguh-vaiqguh hemqgugu, nungzminz couh hainduj ndaem naz lo. Daxboh yousim daxgoeng daxbuz youq lajmbanj nyaengq mbouj gvaqdaej, couh heuh gou ngoenzsinghiz ma lajmbanj bang doxgoeng daxbuz ndaemnaz, couh yienghneix, gou hainduj baez daej-niemh ndaemnaz he lo.

Gou daeujdaengz lajmbanj, dax-goeng gaenq dawz gaiqnaz hung bakmbanj caerauq ndei lo, yienghneix couh ndaej hainduj ndaemnaz lo. Gou angqfaengfaeng riengz daxgoeng daxbuz bae ndaemnaz, gou ngamq roengz naz, song ga couh deng mboet youq ndaw boengz, gou miz di ndwn mbouj maenh, youh roxnyinh miz duzmaz cingq haeb gahengh gou, youh humz youh in. Yienghneix gou couh daj ndaw naz benz hwnj haenznaz bae. Gou soengz youq haenznaz yawj daxbuz caeuq daxgoeng ndaemnaz, cij raen gyoengqde fwngzswix dawz gaem

gyaj, fwngzgvaz mbek go'gyaj ok ndaem roengz naz bae, ndaem ndaej riengjret vaiqvut, yaep ndeu couh ndaem ndaej benq naz ndeu, vanzlij ndaem ndaej baenz hangz baenz coij, cingcingj caezcaez, yawjdwk caen hawj vunz haenhcaekcaek. Yienghneix gou youh caiq roengz naz bae, cam daxbuz aeu gaem gyaj ndeu, lumj gyoengqde ityiengh mbek go'gyaj okdaej ndaem roengz naz bae, hoeng gou yawj geij hangz gyaj gou ndaem haenx, ngutngut ngeujngeuj, yakyawj raixcaix! Daxbuz naeuz: “Mwngz caenhguenj ndaem roengzbae, ngutngeuj mbouj youqgaenj, go'gyaj youq ndaw boengz rox swheij maj hwnj-daeuj.” Gou ngaekngaek gyaenj.

Gou lumj daxbuz nei ngaem gyaenj gungj hwet, youq ndaw naz ndaem geij go gyaj, couh daen laeng yamq ndeu, mbouj yaep ndeu, gou cungj hwet naet ga in, gyaenjgunh dava liux. Yawj daxgoeng daxbuz ndaemnaz lumjbaenz gig soengswt,



mbouj siengj daengz dwg yienghneix dwgrengz. Laxlawz ndaemnaz gij hong neix dwg mbouj ndei guh ha. Hoeng gou mbouj gamj doiqdaug, daxgoeng daxbuz yienghneix geq lo, lij mbouj yietnaiq saek yaep laebdaeb ndaem, gou baenzneix coz baenzlawz couh mbouj guh ne. Gou cij ndei ndaem yaep ndeu couh yietnaiq yaep ndeu. Gig mbouj yungzheih ndaem daengz naz cungqgyang, hoeng gizhaenx boengz gig laeg, song ga gou mboet youq ndaw boengz baenzlawz yot cungj

yot mbouj hwnj. Ai, seizneix gou cij roxdaengz gijmaz heuh yamqdin nanz byaij lo. Gou yungh rengz baez yot ga, “buba” sing ndeu, gou deng laemx youq ndaw boengz, baenz “duzmou ringx boengz” lo. Daxgoeng daxbuz yawj gij yienghceij gou, cungj ruihoho lo.

Mbouj siengjdaengz, ndaemnaz dwg baenzneix hoj guh ha!

(bouxlauxsae son'gyauq/指导老师: Vangz Gveiyangh/黄桂香)

Mok

Mok ha, mok mongmong ha,
Mwngz vihmaz seizseiz cungj
mongmong ne?

Mwngz mbouj ngah bienq
gyaeunde di ha?

Langhnaeuz gou dwg mok,
Gou haengjdingh mbouj
mongmong nauq!

Gou haengjdingh yaek lumj
fwjgyaepbya nei, yaep ndeu cix
nding, yaep ndeu cix henj, yaep
ndeu cix aej, yaep ndeu cix o.

Roxnaeuz, lumj duzdoengz
nei, saek gijmaz cungj miz, vunz
baez raen couh maij.

Mok mongmong ha, mwngz
vihmaz mbouj baenz yienghneix ne?

(Daj《Bonjsei Sim Lwgnyez》
(Veiz Gizlinz raiz) senj okdaej,
Lwgfwnzme(Luz Fwncangj)/卢
奋长 hoiz)



Rijiq Caeuq Roegiq Doxgangj



“Vu vu vu! Vu vu vu!” Byawz youq gizhaenx daej ne? Duzroeg raen geizgvaic lai couh yawj hwnj yawj roengz, sijsaeq dingq sing daej neix. Doeklaeng rox dwg rijiq dahnuengx dinbya, rijiq vihmaz daej baenzneix siengsim ne?

Roegiq guhmuengz mbin daengz henz ndang dahnuengx rijiq, gvensim dwk cam naeuz: “Rijiq dahnuengx, mwngz baenzlawz ne? Byawz hangz mwngz ha?” Rijiq dahnuengx doq uet raemxda doq lwnh: “Roegiq dahcej, mwngz yawj, bangxhenz gou aen nungzyahloz baez hai le, vunz daeuj henz gou guhcaemz lai dangqmaz bae, miz haujlai vunz vut nyapnyaj haeuj gwnz ndang gou daeuj, gou bonjlai ndang seuq sawcingh dangqmaz, vunz vut nyapnyaj le gou couh bienq rab lai, diuzvunj gou bienq ndaem caez, daengx ndang lij miz heiq haeu dem! Vu vu vu!” Rijiq dahnuengx gangj le gangj le couh simnai lai daej hwnjdaej.

Roegiq dingq le, caemh raen simnai lai,

couh ra geij boux baengzyoux ndei daej: Duzciengh daeggo, maxdah daxlungz, duzmbaj dahnuengx, lij miz daegnuengx duzbeih daengj, caez daeuj doxyaeng baenzlawz bang rijiq dahnuengx. Gyoengqde dingq roegiq lwnh le, hozndat lailai, couh guhdoi bae daengz henz rij yawj, dwg caen dahraix. Yienghneix maxdah daxlungz doiq daihgya naeuz: “Boux ndeu deng cai, vunzlai caez bang. Raeuz doxcaez ok rengz, bang rijiq dahnuengx baet seuq gij nyapnyaj neix bae!” Naeuz guh couh guh, duzciengh daeggo aeu aenndaeng youh hung youh raez de baez di baez di sup gij nyapnyaj fouz youq gwnz raemx haenx hwnjdaej liuxcaez bae. Doengh boux baengzyoux wnq hix nyaengq guh, miz vunz gip, miz vunz comz, miz vunz cang, miz vunz daeh, baebae dauqdaug, nyaengq hwnj nyaengq roengz.

Ngoenz daihngheih, ndit ronghsagsag, roeg ciuz va hom. Gyoengq baengzyoux roegiq baet seuq nyapnyaj lo. Seizneix rijiq youh bienq dauq ndei lumj gaxgonq nei, seuqcingh sawrwk, saw baenz yawj ndaej raen rinreq lajdaj, seuq baenz ndaej ingj raen gofaex henz rij bae.

Daihgya raen rijiq dahnuengx baenzneix gyaunde di le cungj angq raixcaix, gyoengqde lauhei q vunz lij dawz nyapnyaj vit roengz gwnz ndang rijiq dahnuengx bae, couh daegdaengq daengj gaiq baizfaex daezsingj ndeu, gwnz baiz sij naeuz: Dieg neix dwg ranz raeuz, vunzraeuz caez in'gyaez. Rijiq dahnuengx gamjdoengh dangqmaz, vihliux gyo'mbaiq roegiq caeuq gyoengq baengzyoux de, de cingj roegiq caeuq gyoengq baengzyoux de daeuj ndaw ranz hai ciengz yinhyoz vanjvei ndeu. Daj neix baelaeng, gyoengqde doxndiep doxyaez baenz ranz ndeu, angqvauvau guhdoi youq.

(Vei Sihyinz/魏诗耘)